

北京圖書館 編

北京圖書館藏珍本
年譜叢刊

第 140 冊

北京圖書館出版社

□ 北京圖書館 編

北京圖書館藏珍本

年譜叢刊

北京圖書館出版社

第 140 冊



十年乙丑二十歲 在家隨侍 家大人授業同學者

爲欽因齋

原名熨

陳秋湖

堃鏞

沈春泉

文藻

三月

赴歸安邑試正場題君子於其言正案第一十八名

五月赴郡試正場題使於四方不辱君命正案第

二十五名

七月歲試學使者爲潘文恭公

世恩先

試古學題爲調水符賦以竹符調取活火親煎爲韻

詩題柿葉肄書得書字次日案發招覆第二名覆試

題爲擬謝希逸月賦以氣霽地表雲斂天末爲韻詩

題長笛一聲人倚樓得樓字七言排律八韻案發予

爲闔屬正取第一名正場題雖車馬次題有如時雨

化之者詩題豐年玉得康字案發撥入府庠第六名
獲雋小試初桃不忘知遇詩賦各藁附錄於後

調水符賦

以竹符調取活火親煎爲韻

誌逸事於東坡品名泉於幽谷藉行汲於山僧庸
取徵於剡竹傳來若斗檢之封藏去如質劑之贖
無憂贖鼎憑翠節之成文不待契繻喜雲濤之滿
斛維吹簫之玉女留苔洞於山隅林巒外繞蘿蔓
中紆挂曉月之簾鉤堂空欲落開石函之寶鏡入
夜長孤繫流泉之潑乳羌淪茗而敷腴想噴霧於
家園猶難竊比問餘花於他日雅足同符于時簽

判鳳翔牽絲隴嶠休假閒尋開襟臨眺對曲澗而
神怡辨清瀾而絕妙涓涓可愛端需脩綆之探澹
澹如忘用仿剖符之調當霽色之堪娛念素波之
是取倘閒道以去來致見欺於童豎從而借潤何
期面目之非眞藉以分甘或慮溜澠之難伍三百
片月團入手清夢徒勞五千卷文字撐腸幽情莫
譜爰制竹符遂令分割借以爲徵用之特達粉節
雕鏤綠筠鮮活鬬角鉤心齊本量未能左能右同
徵數之持籌或往或來異催詩之擊鉢爾其褐錦
刪除霜皮剝墮秀色常瑩芳形永鎖削桐圭而翠

積雅製如斯緝柳簡而光疏佳名許可分來禪榻
之旁置向簿書之左儼過所之達紫關方璽節之
通青瑣匪僅謫官儋耳改呼瓊海之惠通寧徒肅
謁參寥猛憶黃州之槐火乃命小奚以遞汲煩禪
客以徼巡無俟言宣賴此君之足信居然候代比
交子之咸遵銅瓶遠至石鼎徐陳埽落葉以代蘭
蘇湘簾低亞滌瓦鐺而烹綠雪竹夾調勻斟燕坐
供清晨扇花乳嚙芳津剖來蓮萼之杯香塵乍掩
瀉入梨花之盞冷意相親緬風流之獨擅俾韻事
之遐傳誦陸羽三篇符應入譜仿盧仝七碗水自

親煎幻彼南冷笑贊皇之受欺建業誤他豐樂陋
歐陽之枉詰釀泉定築館於修篁永作品茶之客
還訂盟於白水間爲啜茗之仙

擬謝希逸月賦

以氣霽地表雲斂天末爲韻

秋淨圓靈宵沈灝氣素月流空清輝下暨陳王方
悼嘉賓發深愴拚掃廣除招邀羣貴俛歎光陰仰
覩象緯託諸操觚仲宣是謂仲宣迺避席而興曰
臣聞月者魄兆羣陰光臨八裔寶鏡長懸冰輪不
敝孕丹桂而葳蕤偕素娥而瓌麗常溢采于金甃
更增光于煙霽若夫雨洗澄霄飄流商吹銀漢初

斜玉繩未墜木葉脫兮峰青水潦降兮瀾翠望皓
影之衝天疑霜痕之委地仙掌韜華蓬池掩媚瓦
縫冰凝牆霄粉膩一色同昭千川罔異君王於是
步瑤階息庭燎曳羅衣臨璧沼徐撫越桐細斟吳
醪鳳琯清鏘鸞歌繚繞彩暈芳叢輝騰林表樂此
忘疲坐以達曉若乃羈孤失侶親懿離羣情深念
舊道遠思君蛩吟繞砌雁字排雲紅蘭乍歇芳草
無薰幽懷莫寫別緒難分初的的以飛上漸盈盈
而半掩涼露溼兮波翻流霞麗兮芒斂抱窈窕兮
璇題延嬋娟兮碧簾莫不舉舞袂以徘徊惜芳華

之荏苒于時宮商拉雜絲竹駢闐遙和爽籟暗瀉
流泉吳歛續譜楚調重聯心鬱紆而莫適歌皓月
於長天歌曰碾香輪兮臨紫闥佳人逝兮傷契闊
道路修兮寔可越憂心耿耿何時豁雅韻方傳餘
輝木末四座動容彌增忉怛又稱歌曰月將落兮
光一抹時方晏兮斗旋斡微霜下庭除歲暮沾衣
褐陳王曰善乃命侍從奉觴解渴敬繹佳篇長懷
宏達

賦得柿葉肄書

得書字五言八韻

博士留禪舍臨池雅樂胥麥光愁莫具柿葉喜相

於和墨青青滑拈毫片片舒種應傳七絕肆豈待
三餘小異題桐興居然畫荻書細猶苔網膩密勝
貝翻疏揮灑鋒將退辛勤室漸虛種蕉同雅致紅
翠繞階除

賦得長笛一聲人倚樓

得秋字七言八韻

極目長安暮靄浮殘星數點雁行稠一聲羌笛聞
孤館千里騎人在小樓聽徹龍吟初歷歷倚來雕
檻正悠悠疏鐘似其悲遙夜涼杵還隨怨早秋漸
送商飈歸別浦偏催詩興滿芳洲湘簾亞處鑪煙
散畫閣開時月影收三疊陽關游子塞半江楓葉

老漁舟西風此際鱸魚美客夢連宵繞渡頭

賦得豐年玉

得康字五言六韻

正場

清言傳晉代雅度仰文康取喻豐年候欣看美玉
彰殊珍供廟亡成德比圭璋價並連城貴時逢積
歲穰握瑜元共寶被褐豈終藏和璧登

天府希名自遠揚

七月二十日三弟炳咸生 十月陳恭人來歸同郡

南山草堂陳壽泉公

紹藩女

十一年丙寅二十一歲 在家課徒從學者爲沈晉齋

樹棠

王甫山 善成 及二弟 八月應科試學使者仍

爲潘文恭公先試古學題爲白虎觀諸儒講經賦以
題爲韻詩題秋聲秋色案發予在正取第八名正場
題君子義以爲質四句案發予在一等第二十七名

十二年丁卯二十二歲 仍在家課徒 八月隨侍
家大人赴省應鄉試首題天何言哉三句次題在上
位不陵下六句三題舜之居深山之中四句詩題挂
席拾海月得帆字榜發下第

十三年戊辰二十三歲 二月隨侍 家大人至杭州
佛惠寺下榻肄業敷文紫陽兩書院 四月應歲試
學使者爲劉金門先生 鳳誥 先試古學題爲樵夫笑
士賦以樵夫笑士不談王道爲韻詩題螭螟巢蚊睫
得巢字不發案賦錄後

樵夫笑士賦 以樵夫笑士不談王道爲韻

聖天子休光誕被令德宣昭比隆嬀舜取法姬堯
握金鏡而闡明乾祕懸韜鐸而詢及芻蕘化溥菁
莪競識賢局之叩歌傳棫樸咸遵王路之遙文治
協乎垂裳無偏無陂士風醕於挾策不達不挑斯